



MANUAL

Preparem Kumala Olsem Kakai blong Pig we i Save Stap Longtaem

BLONG ADAPT LONG CLIMATE CHANGE



From Wanem Yumi Wantem Mekem Silage?

Process ia blong priperem kumala olsem **silage** hemi wan wei blong storem kakai blong pig blong i save stap longfala taem, mo blong hemi gud mo sef tru long wan taem blong disaster or wan extreme klaemet event olsem saeklon.

Silage hemi wan nambawan Kakai blong Pig we hemi klin mo seif long rabis sik/disease.

Hemi save mekem pig I kro hariap mo produsim gud quality meat mo mekem se yu save salem pig blong yu hariap nomo.

Niufala Teknik ia Research Station Blong **NARI** we oli base long Papua Niu Guinea oli trenem gavmen blong Vanuatu long hem,mo SPC-GIZ I work wetem blong impruvum blong hemi kam stret lo kaontri blong yumi mo ol fama blong Vanuatu.



Wanem Materials Bae Yu Nidim?

1. Kakai mo lif blong Kumala
2. 25 lita pubel
3. 1kg table sol
4. Strong plastic bags
4. Scale
5. kitchen scraper
6. Bush naef/big mo smol
7. 2 tarpaulin/strong plastic
8. Nilon rob

Wanem Nao Process Blong Mekem Silage?

1. Tekem Kumala long Karen Blong yu mo karem wetem ol lif blong hem ko wasem long wota blong I mas klin. Mekem sua se ol kumala we yu tekem bae I mas inaf blong fidim pig blong yu. Exampol: tekem 2-3 basket blong kumala spos yu gat 5 pig lo fanis.



2. Skelem kumala mo lif long wan scale mo mekem sua se weight blong kakai mo lif blong kumala bambae tufala I no mas semak. Exampol: spos kakai blong kumala hemi 4kilo bae lif blong hem bae hemi sut 3.5kilo nomo
3. Taem kumala emi klin finis yu mas putum lo sun blong dry. Karem tarpaulin or wan plastic blong katem kumala iko long hem. Yu No mas mixim kakai blong hem mo lif blong hem long wan ples taem yu katem, bae tufala samting ia I mas stap long seperet ples.



4. Katem lif blong kumala wetem bush naef/smol naef mo katem I smolsmol olsem aelan kabis.
5. Rasrasem ol kakai blong kumala wetem scraper we bae hemi smolsmol gud.
6. Karem ol smol smol pis blong kumala mo lif mo putum long sun blong I dry bakagen
7. Afta long 30 minutes, sapos sun hemi hot inaf, bae ol kakai mo lif blong kumala bae hemi dry, be spos sun hemi no hot inaf, yu putum kasem 1 haoa o 2 blong. Be mek sua se ol kakai mo lif blong kumala bae hemi no mas over dry be bae hemi dry smolsmol nomo.
8. Taem oli dry gud inaf, yu mixim kakai blong kumala wetem lif blong hem tugeta mo tantanem wetem sol blong bae hemi gris gud. Mekem sua se taem yu mekem mixing blong tufala bae ples hemi mas klin oltaem mo nogat toti I mix wetem ol kakai blong kumala mo lif blong hem.
9. Taem yu tantanem finis bae yu karem 25 lita pubel blong yu mo plastic bag we I strong gud mo putum I redi long saed. Plastic bag blong yu bae yu mas mekem sua se hemi no mas gat hol long hem.
10. Putum plastic insaed long pubel. Blong avoitem plastic hemi broke bae yu doublem plastic mo mekem sua hemi fitim gud pubel.
11. Sakem mix kakai blong pig I ko insaed long pubel mo every taem yu sakem kakai iko insaed, yu mas mekem sua yu ramem gud kakai usum hand mo leg blong I strong mo i no alawem air blong ko insaed. Mekem sua leg mo hand I mas klin.
12. Taem pubel I fulap gud, yu sakem las sol iko long top blong hem blong mekem sua se hemi rimuvum eni smol
13. Fasem taet plastic bag mo mekem sua se yu karemaot every air insaed. Sapos yu doublem bag, fasem hemia we I stap insaed fasteam, afta fasem narawan aotside
14. Sarem gud lid blong pubel mo putum long wan seif ples we bae ol animol olsem rat mo dog bae oli no save spoilem.
15. Long nekis dei, ko openem lid blong pubel mo jekem sapos plastic bag hemi soelap. Taem we I soelap, I soem se proses I stap wok gud. Sapos plastic bag hemi no soelap, I minim se kaikai I no done gud mo yu mas mekem sua se yu fidim pig hariap long hem bifo hemi sting.
16. Sapos bag I soelap fastaem, afta long wan moa dei, plastic bag bae I sud slak bakagen hem wan.



17. Nao yu save leko pubel I stap mo afta long 3 wiks bae hemi redi blong fidim pig long hem.
18. Every taem yu openem plastic blong fitim pig yu mas mekem sua blong sakem sol iko bak long top blong kakai mo taetem gud plastic iko bak long semak ples blong hem.



Samfala Tingting blong Silage:

1. Yu no mas fidim silage ia long ol smolsmol pig we oli stap titi yet long mama. Yu mas wet kasem taem ol pig oli gat 4-5 manis afta yu save fitim ol-geta long kakai blong kumala ia.
2. Process ia yu save storem kakai kasem 7 manis bifo hemi nogud.
3. Yu save usum ol nara kaikai tu olsem Taro Fiji, mo Manioc blong mekem semak kaen fasin blong silage
4. Maet pig blo yu I no laekem kaikai ia festaem, be no wari, bae hemi jes stat blong laekem afta. Yu save mekem pig hemi hangre o addem smol wota blong mekem kaikai I wetwet smolYu mas mekem sua se ples blong kakai blong pig blong yu I mas klin mo nogat toti.
5. Wan pig I save kaikai bitwin 1-2kg long evri dei, depend long size blong pig.
6. Sapos yu wantem mekem Silage, yu mas mekem evri wok long wan dei, no leko haf work long nekis day fromse bae Silage ino gud



**Blong Moa informesen, kontaktem
Dipatmen blong Livestock or
SPC-GIZ Climate Change Vanuatu**

SPC/GIZ Coping with Climate Change in the Pacific Island Region (CCCPiR)

PO Box 306, Port Vila, Vanuatu
phone: +678 555 2187 / 29594
E-Mail: Christopher.Bartlett@giz.de

